

# Zašto volim Muhammeda a.s.?

Muhammed, a.s. je čovjek kojeg nije teško voljeti. Imao je osobine koje rijetko koji čovjek može imati. Kroz ponašanje Muhammeda, a.s, ljudi shvataju vrijednost života.

Naučio me je da poštujem sve ljude, stare i mlade, odrasle i djecu. Poslanika, a.s., volim i zato što je čak i kao dijete bio pošten. Nije lagao, varao niti krao i to treba da bude primjer svima nama. Volim ga jer me je naučio strpljenju, bio je primjer pokornosti i zahvalnosti kako Allahu, dž.š., tako i ljudima.

Poslanik, a.s., je moj učitelj koji me je naučio vrijednostima ovog ali i budućeg života i podsjeća me da je život na ovome svijetu kratak i prolazan.

Volim svoga Poslanika, a.s., jer je toliko ljudi uputio na pravi put, naučio nas je da budemo skomni, a ne oholi, da brinemo o svojim bližnjim, da budemo poštene ljudi, a ne iskvareni. Naučio me je da volim svoju vjeru, a tuđu da poštujem.

Muhammed a.s. nije samo govorio, nego je i djelima pokazao kako se treba odnositi prema svome Gospodaru, prema roditeljima, prema drugima i prema živoj i neživoj prirodi. U njegovom srcu je bilo ljubavi dovoljno za sve. Pomagao je starije i nemoćne, a svojim svjetlom je otjerao mrak od neznanja koji je vladao među ljudima. Naučio nas je da se previše ne vežemo za imetak ovoga svijeta, jer na budućem od njega nećemo imati mnogo koristi. Naučio me da poštujem sve ljude bez obzira na njihovu vjeru, boju kože...

Muhammed, a.s. je moj životni uzor, a njegov sunnet je moj putokaz. Volim ga, jer je bio povjerljiv, davao savjete svakome i pomagao svakom ko bi to od njega tražio.

Često zamišljam kako bi bilo lijepo upoznati Muhammeda, a.s., jer on plijeni moje srce, ali i srca miliona ljudi širom svijeta.

Ovaj svijet bi bio mnogo ljepši kada bismo se ugledali na njega i radili ono što nas je on naučio.

Iako sam još uvijek dijete za koje kažu da ga još svijet odraslih nije iskvario, ono što sa sigurnošću mogu reći jeste da se moja ljubav prema Poslaniku, a.s., neće ugasiti. Jedino što mi preostaje jeste da se uzdam u tu svoju ljubav, te da ću odrasti u osobu koja je uspjela da usvoji pouke Poslanika, a.s., i da po njima živim.